



BIBLIOTHECA  
UNIV. JAGELL.  
CRACOVENSIS

37538


Mag. St. Dr.

P



37538

I



1885. I. 14.

BREVIS  
INSTRUCTIO

de

Vita Religiosa post  
absolutum Tyrocinium,  
tempore tam proximè quàm  
omni deinceps sequente, ma-  
xime à junioribus for-  
mandâ,

Auctore

*P. Gaspare Druzbiezki,  
Societatis Jesu.*

Nunc omiſſis iis, quæ Ve-  
nerabili Societati Jesu erant pro-  
pria, ad cujusque alterius Reli-  
gionis usum, accommodatus,  
recusus

1703.



## Præfatio.

37. 538. I.

**E**st quidem cuius Religioni proprius suus Spiritus, propria vivendi ratio, ritusque proprius, si vel accidentales observantias, vel specialem cuiusque instituti finem spectemus; at si illa, quæ Religionibus omnibus, ipsique perfectioni Christianæ communia, atque essentialia sunt, attendamus, ea, quæ de his tractant, quadrant omnibus, diversam licet Religionem professis. In Rigore, in habitu, in ritu observantia, & disciplina ratione, in modo conversandi cum hominibus, in fine sui instituti, quod













quod modò activum, modò con-  
templativum, modò mixtum est,  
nullus pæne cum alio convenit,  
religiosus ordo, & vel maxime  
convenit in tribus substantialibus  
votis, non quoad communitates  
(quæ quandoq; & ipsa, sicut earum  
membra particularia, dominio,  
usuq; libero carent) sed quoad  
individua singularum, verbo: in  
votis substantialiter considera-  
tis, uti & in humilitatis, abne-  
gationis, orationis, aliarumq;  
Virtutum substantiali, veraq;  
& genuinâ praxi, mediis extir-  
pandi vitia, & implantandi  
Virtutes; ut proinde exempla  
& Doctrina Virtutum edita à  
Secularibus, item omnino diffe-  
rentibus ascetis, cuilibet ad In-  
structionem & profectum ser-  
viant, sicut ab antiquorum Sano-  
ctorum Patrum nec non Eremitarum

☉   ☉   ☉

**I**tarum quæ exemplis, quæ gnomis  
Secularis, Regularisq; mundus  
eruditur, dirigitur, incenditur.  
Dolendi igitur sunt tanquam di-  
scretionis expertes, qui fastidi-  
unt omnia, quæ ab aliis quàm  
suam Religionem, & maxime  
piientissimis Societatem Jesu pro-  
fessis, in publicam lucem, & com-  
munem omnium piorum usum  
sunt edita.

**I** Tu pie Lector, juxta monitum  
Libelli de Imitatione Christi,  
non, quis hac scripserit, sed, quid  
dicatur, attende. Ut tamen  
minus fastidias, omisi, quæ auctor  
Religiosissimus suæ Societati Jesu  
propria inseruit, nihil tamen  
substantiale mutavi.





## CAPUT I.

### *De Generalibus Documentis Vitæ religiosa post Tyroci- nium agenda.*

**I**n primis sciendum est, duplex  
esse Tyrocinium. Aliud ad  
vota & professionem; aliud ad  
virtutum perfectionem. Prius  
tyrocinium perficitur, definiturque anno,  
vel duobus, pro more cujusque Religionis;  
quò elapso tempore vota fiunt, & finis ty-  
rocinii venit. Posterius vero tyrocinium,  
à fine prioris, maxime inchoatur, & omni-  
bus annis, sequentibus, quibus religiosus in  
ordine vivit, trahitur, donec ad perfectio-  
nem statui suo competentem, & ad perfe-  
ctas virtutes perveniatur. Ideo etiam post  
Novitiatum vota emittuntur, ut quodam-  
modo jaciatur fundamentum secundi ty-  
rocinii, certiorque reddatur, & Deus, & Re-  
ligio, & homo ipse Religiosus, quod sit de-  
inceps futurus Sectator perfectionis, quam  
status exigit, qui constituitur Votis. Hoc  
ergo

2 *CAP. I. De Generalibus Documentis*

ergo tu tyrocinium factis Votis ingressus & aggressus es: hoc per sequentes annos peracturus es, hoc finire in tuâ potestate in tantum est, in quantum ad perfectionem pervenire, in tua cum Dei auxilio positum est curâ & libertate; in tantum verò extrâ facultatem tuam est, in quantum sine adeptione perfectæ, solidæ, consummatæque virtutis, tyrocinium hoc terminari non potest, hoc enim ipso durare tyrocinium teque Novitium esse, necesse est, quod te per ignaviam lentitudinemque tuam ad perfectionem non pervenire continget. Hujus ergo tyrocinii finis est consecutio perfectionis; quæ tunc erit, quando statû rectè, disciplinatè, perfectèque; vivendi, ita tibi familiarem reddideris, ut tibi sic vivere, non violentia sit, sed natura; non labor, sed oblectatio; non conatus, sed Vita.

Sciendum præterea Novello Religioso duplicem mutationem subeundam esse, unam Tyrocinii sui initio, alteram in fine ejusdem. Mutatio subeunda initio conversionis ad Deum, initioque ingressus ad Religiosum Tyrocinium, in eo posita est, quod ingrediens debeat mutare mores, et si quandoque non morum objecta; quam

*Vita Relig. post Tirocinium agenda. §*

quam & horum pleraquè mutanda illi sunt, si quæ tamen non sint, in quibus nihilominus tractandis mores & modi mutandi sunt, longè enim alios mores assumere, discereque debet in Religione, ab eis, quos habuit in sæculo, ob hocque principaliter anni tyrociniorum in Religionibus instituti sunt, ut quando ad illas ex sæculo veniunt, per illos dies, mores sæculi dediscant & deponant, mores verò religiosos, sæcularibus prorsus oppositos addiscant, & assumant: adeo ut etsi contingat, quandoque tyroni id agere in clauistro, quod æstibat in sæculo, aliter tamen omninò agat in clauistro, quàm agebat in Sæculo. Jam vero mutatio subeunda tyroni in fine tyrocinii sui, in eo posita est, quod finiens tyrocinium atque etiam ex eo egrediens, objecta quidem & occupationes ac munia, officiaque vivendi mutet, mores tamen in objectis & occupationibus & officiis, nunquàm omninò (nisi forte de bono in melius, de imperfecto in perfectius) mutet, sed quos in tyrocinio didicit, hos tota sequenti vitâ suâ, in omni loco, tempore, omni reque seruet; ad hoc enim eos mores in tyrocinio didicit, assumptisque, ut per

#### 4 CAP. I. De Generalibus Documentis

omnem religiosam sequentem Vitam iisdem moribus legibusque vivat; alioqui, si cum posito Tyrocinio etiam mores Tyrocinii deponendi essent, magna certe ea, tum Dei, tum Religionis, tum ipsius Religiosæ deceptio foret; sed nequaquam deponendi sunt, verum ut dixi, totâ deinceps Vitâ servandi, imo augendi & perficiendi.

Itaque quomodo didicisti in Tyrocinio orandum, meditandum, de spiritualibus rebus lectitandum, colloquendum, de statu animæ tuæ cum Patre spirituali agendum, Sacramenta Pœnitentiæ & Eucharistiæ usurpanda, conscientiam Examine generali particularique examinandam, intentiones puras retinendas, renovandasque sæpius in diem, Regulas etiam minimas observandas, charitatem fraternam, obedientiam punctualem, mortificationis internæ & externæ studium, ad omnia indifferentiam, humilitatis exercitia, ceteraque huiusmodi studia practicanda esse, ita prorsus in omni Vita sequenti per omnia officia, muniâque Religiosa pergenti ad ultimum Vitæ terminum observanda, nec unquam negligenda, aut perturbationi, sed cum omni diligentia perfectioneque

neque majori peragenda erunt. Atque hoc erit post Tyrocinium peraetum mutare quidem forsitan objecta, sed non mores, mutare actiones, sed non agendi modos, mutare officia, & vivendi circumstantias, sed non Vitam, sed non semetipsum, nisi fortè, ut dixi, semper in melius atque perfectius. Hæc igitur secundi generis mutatio tibi ad Studia Venienti, & Tyrocinium mutanti subeunda erit deinceps, non alia. Ages non pauca post professionem, quæ in Tyrocinio non egisti, attamen non debebis, nec debes aliter quàm in Tyrocinio agere didicisti. Hoc si tenueris prudenter, atque constanter, non murabit in te occupatio studiorum, aut alia, vel locus convictus Virtutem, sed augebit atque confirmabit, & licet in dies semper antiquior fies, magisque veterasces, quo ad tempora & officia, atque munia, semper nihilominus fervendi, & agendi, vivendi, morumque ratione coram Deo, tuæque conscientia integer Novitius, hoc est integri & integritate roborati, arctique Spiritus Religiosus, quo unò ne vix quidquam rarius, vix quidquam felicius est in Religiosis hominibus.



6 CAP. I. De Generalibus Documentis

Sciendum insuper, in quo consistat hæc immutabilitas constantiaque morum, in Tyrocinio haustorum quantumlibet objecta & occupationes mutari contingat. Consistit autem in duobus. Primo quidem in observatione, Secundo in applicatione; quod ut melius cognoscas, adverte: Tyrocinii occupationes duplices esse: quædam enim purè simpliciterque Spirituales sunt, quædam non sunt naturâ suâ, sed tantummodo agendi spirituales. Itâ orare, meditari, examen facere, humiliari, mortificationes internas externasque subire, Sacramenta usurpare, virtutum actiones exercere, Intentioni, Devotioni, Præsentia Dei, Charitati fraternæ assuescere, sine facultate nihil præsumere, silentium servare, &c. hæc similiaque sunt actiones merè spirituales naturâ suâ. At verò occupationes externæ officiaque publica in Refectorio, aut alibi ministrandi, exercitia item manualia, hæc non sunt naturâ suâ spiritualia, sed ex modo tantummodo agendi, quem illis applicare oportet spiritualement: eaque applicatio in Novitiatu discenda, & ex Novitiatu etiam efferenda, atque post Novitiatum conservanda est.

est. Prioris generis occupationes, Tyro, ex toto secum deferre, eoque modo, situ, tenoreque, quo in Novitiatu didicit servare sequenti vitæ tempore debet. Ista enim studia & occupationes Religioso substantialia sunt, nec absque illis Status ejus stare durareque potest. Posterioris generis occupationes, non ex toto semper & ubique locum habent, etsi etiam aliquem habent, sed mutantur ferè in studia literarum, non negligendo tamen exercitiorum illorum subinde usum, prout obedientia, & ordo domesticæ disciplinæ assignaverit certos dies, certaq; tempora his obeundis.

Harum igitur posteriorum actionum peragendi modum (esto non ipsas actiones) Tyro efferet secum è Novitiatu, officiisque & occupationibus sibi assignandis, vel assignatis applicabit, ut eas, cum ea perfectione devotionis, disciplinæque obeat, cum qua in Tyrocinio v.g. qua perfectione spirituales libros lectitabat in Tyrocinio, eadem leget alios studiis suis opportunos ac lectionibus necessarios: quâ perfectione Religiosæ disciplinæ vacavit, sibi suoque Spiritui in Novitiatu, eadem perfectione vacabit sibi suoque in literis ac

Spiritu profectui aut aliorum saluti doctrinæ post professionem, eandem servabit intentionis puritatem, Resignationem in placitum Dei, Indifferentiam, patientiam, silentii curam, &c. Quâ simplicitate se suaque Deo & curæ Dei superiorumque concredebat in Tyrocinio, eâdem postea: quâ resignatione ac mansuetudine in Tyrocinio expectabat, acceptabatque officia, singulas vel alternas in hebdomadas, eâdem subibit expectabitque singulos in annos, imo in singulos dies; quâ curâ excubabat in minimas mortificandi, abnegandi, humiliandi que sui, charitatis vero aut obedientiæ exercendæ occasiones in Tyrocinio, eâdem excubabit post Professionem; quas consuetudines pias in cæteris locis, temporibus, actionibusque habebat in Tyrocinio, easdem in similibus, & aliis servabit post Professionem, & quidem ex designatione, & quidem etiam minimas, nisi mutet in meliores.

Hac & simili ratione vivere in studiis vel alio munere, est mores non mutare, sed eos ad objecta & occasiones, officiaque per obedientiam mutata applicare. Hac similique ratione post Professionem vivere  
desi-

desidera, Statue, & mox post illam incipe, auxilium Divinum implora: Sic enim faciens, non tantum non perdes quidquam de fervore, primitusque Spiritus in Novitiatu hausti, sed etiam multo cum foenore cum in te augebis ac stabilies, cum plurima cordis tui, & aliorum tecum conviventium consolatione atque ædificatione.

## CAPUT II.

### *De Natura novi Religiosi.*

**C**onsidera naturam novi Religiosi, tuam scilicet, quæ ex Tyrocinio prodeas, prodierisve. Etsi enim nō omnes eodem modo dispositi, affecti, perfecti, in bonis moribus solidati, & habituati prodeant, sicut non eadem etiam omnes fervoris mensuræ Tyrocinii tempus transigunt, nec easdem omnes luctas in se debellandas habeant, tamen quales ut plurimum plus minus prodeant, qualisque & tu probabiliter, humiliterque de te sentiendo prodeas, utiliter considerare potes, quod quidem ex sequentibus imaginibus speculisque disces.

A 5      Prima

Prima igitur sit imago ab Agro vel horto desumpta. Ager quantumlibet cultus sit, & à rudibus noxiisque herbis purgatus, ac bonis seminibus confitus, ille tamen sumpte naturâ partim, partim ex radicum profundè hærentium fibris reliquiisque noxias herbas & frutices pullulare non desinit, & usque adeò simul cum bonis herbis eas fundit, ut nisi adsit agricolæ industria, bonas segetes malis supprimat ac suffocet. Talis est prorsus novellus Religiosus, qui per tempus Tyrocinii sui, esto suâ Magistrorumque Spiritûs industriâ, ac Divinâ gratiâ optimè cultus, à vitiis, ab affectibus, à passionibus malis inordinatisque purgatus, confitus etiam bonis optimisque doctrinis & actionibus, & affectibus, & Regulis, tamen nisi adfuerit propria & Spiritualis Magistri, etiam post Novitiatum cura & diligentia, & putata pullulabunt, & putata recrescent, & excisa renascentur; praviqûe mores ad tempus domiti, recisi, repressique reviviscent, naturaque ad sua jura ad sui scilicet quæstionem redibit, & cum bono semine excrescent simul spinæ, suffocabuntque nisi caveris, ac bonum semen & spem agricolarum operam.



ramque eludent. Hoc expende diligenter, & altè animo demitte, tibi ac tuæ in Tyrocinio acquisitæ perfectioni mortificationique ne fide, sed sta in timore, & scito, quia velis nolis in medio tui habitat Iesus, & igniculus perversitatis adhuc vivit, & natura adhuc in te tota integraque in sua vivacitate est, cui si quid induleris, si quid de conatu remiseris, si adductas hastenus mortificatione laxaveris habenas, insolescere & recalcitrare, fessoremque excutere facillimum erit. Nolis hoc experimentum discere, sed elige, ut te faciant aliena pericula cautum.

Secunda Imago desumpta à natura bestiarum, quæ arte humana usuque cicurari & modos quosdam humanæ rationis imitandæ ediscere solent, si tamen suas illis connaturales delicias objicias, illico institutionis illius oblitæ vel in medio cursu artificiosarum actionum naturam resumunt, & ejus impetu feriuntur in sua objecta, unde illud vulgare: *naturam expellas furcâ, tamen usq; recurret*. Tale prorsus est ingenium naturarum, talè & tuum, tuæque naturæ inferioris pondus; domari quidem potest natura, subigi & subjici ad tempus potest:

potest : potest & in rationis , ac fidei , & gratiæ , & disciplinæ ordinem , mortificatione severitateque tanquam fræno cogi ; tamen, illa semper excubabit vigilanter ad suas cupedias sensuales , ad suas propensiones naturales, ad sua Jura injusta , ad effræniatas impotentias tuas, ad illiberales libertates suas ; est enim admodum retinens natura sui juris , & sub omni , imo sine omni occasione, semetipsam quærere, oblectare, tueri, fovere non omittit. Novit etiam dolosissimè necessitates comminisci, novit contra rationem pugnare ratione ; novit sub auxiliis gratiæ adversarios parare gratiæ, Spiritumque spiritualibus figmentis eludere , ac opprimere. Quantumlibet ergo putes, te naturam humanitatemque tuam domuisse, vel exuisse etiam , nè crede tibi , usque & usque illa recurreret, cum minimè senseris , imo hunc ipsum sensum tuum , quo domitam naturam tuam plus satis credis, indubitanter scito jam esse viventis, revalescentisque naturæ sensum ac motum & impetum ; Quanto ergo magis domitam naturam tuam credes, tanto minus domitam crede : tunc magis erit domita, quando tibi minimè videbis

tur domita. Sic enim timebitur, cavēbitur, premetur, consequenter domabitur.

Igitur sic post Professionem vivendum, ut te natura magis nunc hostem, quam antē experiatur, ut magis nunc gratiæ contra naturam, Spiritui contra sensum carnemque milites, & arma suppedites, dans operam, nē in te occupationum (qualia sunt studia, & alix exercitationes) fervore incatescant humani inferioresque affectus, intepescat vero solidarum virtutum, & Religiosæ vitæ amor.

Tertia Imago, similis illi Horatiano Adolefcenti, *tandem custode remoto*:

*Gaudet equis canibusque & aprici gramine campi*

*Cereus in vitium flecti, monitoribus asper.*

Aut si mavis, similem illi prodigo filio, qui acceptam à Patre substantiam promovit, malè & incautè vivendo utendoque, solent namque Novelli Religiosi, à disciplina rigorosiore, (ut quidem illis nihil præter Tyrocinium expertis videtur) & ab oculis manibusque Instructorum Spiritualium digressi, atque ad vota admitti, imaginari si-

bi jam omnia bella esse finita, jam satis datum observantiz durioriꝛue vitæ, jam sibi licere competereq; custodibus procul vivere, aut certè conniventes illos habere. Hac persuasione, de qua iterum erit consideratio, nihil perniciosius Novello Religioso, ut proinde nihil detestabilius esse debeat. Contingere hoc Novis Religiosis ut credas, expende diligenter Verba S. Bonaventuræ, ità de illis scribentis: *Nonnulli mox ut prima limina bene vivendi attingerunt, obliti quid fuerint, affligi jam per pœnitentiam de consummatis nequitis nolunt laudari etiam de inchoata justitia appetunt, præesse etiam melioribus se concipiunt: oneribus difficilibus occupati, atque ipsa occupatione confusi, non solum perpetrata minimè deplorant, sed ad hæc, quæ deploranda sunt, accumulunt. Eam ob rem idem Religiosos tales admonet, Præsumptionem fugere, profectum profiteri, curam terrenorum abjicere, charitatem, humilitatem, paupertatem, constanti affectu exercere, & super omnia se ipsum considerabundè attendere.*

Hoc igitur maximum in egressu Tyrocinii timendum & cavendum: nè putet  
se

se jam esse absolutum ab omni cura & custodia, ne putet sibi jam majorem libertatem dissolutionemque competere, nè putet fas esse sibi, in Regularum & disciplinæ observantiam, inque sui continendi rigorem impunè peccare, hoc enim esset effici Juvenculum indomitum, ut vocat Spiritus sanctus; hoc esset fieri Onagrum in syivis, qui se liberum natum putat; hoc esset fieri osorem correctionis, & consequenter vestigium peccatoris; hoc esset tradi in reprobum sensum, & in animum irreverentem, ac infrunitum, quâ pœnâ vix post damnationem æternam, ulla potest cogitari major.

*Quarta Imago.* Sciat Tyro se modo esse velut ceram mollem, velut teneram arbusculam, velut tabellam rasam, politam, mundam; Quas & qualibus sigillis figuras, in hac vita sequenti accepturus sit, attendere debet; quam in partem & à quali manu, à plantatrice & erudita, an ab eradicatrice & ignara, flectendus, purgandus, præcidendus, circumfodiendus sit, attendat; quali manu & quibus characteribus imbuendus sit, videat; nè adulterinam effigiem expressam accipiat; nè ad-  
ulter



ulterina manu venenato purgetur cultello; nè in Aquilonem, à quo panditur omne malum, flectatur; nè spuria vitulamina inferantur, boni autem palmites resecantur: nè informes, ac funelli characteres imprimantur, quos nunquam deinceps, aut vix unquam eluerit, nè sibi cæco, cæcus quis & male feriatuus Magister ducatum præstet, seq̃te secum in foveam præcipitet; eam ob rem nemini se facile permittat, sed ab eis, quos invenerit Dei locum tenere, expectabit indagabitque viam bonam, & Dei voluntatem. Interroga Patres tuos & dicent tibi, Majores tuos & annuntiabunt tibi de vita, in qua ambules. Si enim obvio cuique & arriendenti captantique se adjunxerit, ut cæcus luscum ductorem reperiet, quodsi etiam se ipsum Magistrum sibi constituet, utique stulto & ignaro, se discipulum subdet.

Itaque legitimâ & à Deo constitutâ ordinatâque via, quam in Tyrocínio didicit, progredietur Tyro; ceram se exhibebit, arbusculam se exhibebit, tabellam se exhibebit, sed solis præpositis, Ducibus, Patribusque Spiritualibus, quos sortitus Deo  
pro-

providente fuerit : ad aliorum consilia & monita, non temerè, non securè accedet, nisi consultis approbantibusque majoribus, hoc s' cum statuet, hoc à Deo supplex petet, & sincero simplicique corde, Dei se providentiæ gubernandum permittet : hoc specialiter flagitabit, ut sibi, tam Superiores, quàm Sprituales Patres, quàm Contratres, Sodales Cohabitatoresq; omnes provideat, qui sibi sint Duces ad Deum, ad utrores ad virtutem, stimuli ad sanctitatem, media ad perfectionem, atque ad æternam salutem, iis quidem, quibus Dei Sapientissimæ voluntati, & omnipotentissimæ Sapientiæ complacuerit modis.

### CAPUT III.

*De Fundamentis, quibus immobiliter inconcussèque, oportet inharere nobis Religiosum egressum ex Tyrocinio.*

**N**otum esse debet omni Religioso, si velit inconcussè stare, seque in suo arrepto proposito, statique conservare,

Vare, quædam debere diligenter defendere, conservareque veluti fundamenta ædificii sui ipsius, quibus manentibus stare, ruentibus labi necesse est, omnem structuram; non secus ac illas Domos Evangelicas à Christo Domino depictas, quarum una, in petra firma quod esset ædificata, nec fluviis, nec imbribus, nec ventis, nec fluminibus everti potuit; altera quia in arena fuit fundata, supervenientibus ventis ac tempestatibus eversa est, factaque ruina Domus illius magna. Fundamentorum

Primum sit, vehemens, ardens, solidus, inconcussus, obstinatus & prorsus in Dei salutis amore radicans, vocationis Religiosæ amor. Quo amore solidatus & nunquam de vocatione deserenda cogites, & nunquam in ejus tenera, grandique apprehensione fluctues. Omnes quidem desertores mundi & Religiosæ vitæ assecras, ab ipso primordio conversionis suæ, oportet esse ad omnes contra vocationem Religiosam insultus Dæmonis cæcos ac surdos, ac planè rupes, peculiari tamen modo in Novellis Religiosis & ex Tyrocinio digressis, id necessarium est. Etenim  
sicut

sicut Novitiis à sæculo ad Religionem confugientibus occurrunt non pauca insperata, difficilia & aspera inexpertis, ex quibus proprium est, accedente Diaboli astu ad omnes cogitationes & occasiones intenti, cogitationibus contra vocationem titillari, aut etiam pulsari, pœnitudinēque arrepti propositi percelli, in quo casu, opus est esse eos præsentis animo, & in Deo fidenti, atque Superiorum suorum consilia exquirere, iisque niti, si victores esse velint; ita Novellis Religiosis possunt se offerre aliqua inexpectata insperatāque, ad quorum vel præsentiam vel opinionem, animo cohorrescens, pœnitudinē etiam quadam percellantur, fluctuent, ignari quid teneant, quove se vertant. In quo casu consimiliter opus est eos planè rupis instar, stare inconcussos, in vocationis amore ac pretio, fidere Deo, cui se totos permiserunt, votisque donarunt, recurrere ad viæ vitæque suæ Duces, iisque candidè omnia aperire, quibus non nihil conturbari contigerit, eorumque stare consilio; experimento haud dubiè discent, monstra illa, quæ videbantur viribus suis superiora, risu fuisse explodenda tanquam pueriles

les terricationes. Hoc tamen facere non poterit, qui vocationis amator non fuerit immotus, qui sibi fidens, viribusque suis, non ad Deum, non ad Superiores suos recurrerit. Itaque saxeum & ad emolliendum concutiendumque impossibililem vocationis amorem in pectore cordéque tuo gerens ubique defer, ita, ut cum Dei gratia possibilis sit cælum & terram transire, quàm te, in vocationis amore solide fundatum, tantillum etiam agitari, vel dubitare, vel tepescere, &c.

Aliud Fundamentum, cui immobiliter Novellus Religiosus debet inhzrere, si cupit in consequente vita, spirituale suum ædificium inconcussum stare, ac porro etiam valde in profectu crescere esto, vehemens & ardens, & robustus, & ad omnia opponentia se pervincenda resolutus, perfectionis in omni virtute statui tuo convenienti amor, ex quo amore fluat in te.

I. Incessabilis insatiabilisque fames, magnæ non plebejæ sanctitatis, perfectionis. II. Inviolabile & nusquam interruptum, proficiendi profectumque curandi, æque in summis ac in minimis exercitiis propositum. III. Infatigabilis labor in curando &



exercendo profectu acquisitioneque virtutum. IV. Ordinaria simulque perpetua diligentia in omnibus propter Deum susceptis oneribus, cum summo fervore devotionis perfectionisque, ut exosa Deo repeditas locum non habeat.

Adverte porro, hunc talem, tamque pugnacem resolutione perfectionis amorem, raros admodum secum ad Religionem deferre, rariores etiam, qui hunc amorem utcumque detulerint, cum deinceps in Tyrocinio conservent, reperiri, ordinariè namque eum in Tyrocinio deperdunt, neque ad studia & alia munia deferunt: quod, si cui non contingit, tamen post professionem rarus est, qui hunc amorem non deponat deperdatque, vel saltem de eo non sensim remittat, magno utique Spiritus & perfectionis damno, Divinique honoris injuria, & quidem non tam studiorum, aut convictuum &c. ut vulgo dici credique solet, sed Religiosorum culpa. Hi enim egressi à Tyrocinii disciplina, ante omnia, & non advertenter terè respirant ab onere disciplinæ; rigoris Novitatici, quasi fessì, æque impositum finem à tempore, ita & imponendum a se

in observatione imaginantur. Admittunt etiam persuasionem laxioris vitæ observantiæ, post professionem minoris Superiorum vigilantia, lentioris cœne exactioris, inde & ipsi remittere se posse putant, deq; facto, veluti acquisito jure, remittunt, de sui custodia, de collectione, de silentio, de modestia, de orandi frequentia, de præsentis Dei memoria, reverentiâque, de rerû, lectionum, Spiritualiumque colloquiorum cura, ita sensim irrepit negligentia, perfunctoriâque divinorum tractatio, irrepit contemptus & omisso solitorû excitorû, irrepit libertas sensuum interiorum exteriorumq; effrenatio passionum, garrulitas, oblocutiones, familiaritates, levitates succrescunt, & emergunt, quæ latuerunt, vitia pravique habitus, effugatur devotio, amittitur, si quis fuerat Spiritus, deperit fervor: multa negliguntur, multa in oblivionem abeunt, omnia negligenter, perfunctoriè, & in speciem tantum peraguntur, obruitur gratia, revalescit natura, excluditur Deus, lascivit caro, regnat Diabolus. Ergo corrumpuntur in studiis, convictibus, aut diversis muniis Novelli Religiosi, non tam ab occupationibus & locis, quam

quàm à semetipsis, nec per aliud quidquam nisi quia respiratum est in fervore & disciplina, & resolutus obstinatusque perfectionis amor, vel extinctus, vel restinctus est. Hunc tu igitur amorem tanquam radicem, tanquàm fontem scaturiginē omnis boni, omnis salutis, omnis in bono perseverantiæ, atque progressus in te serva & tuere tanquam pupillam oculi, tanquàm cordis medullā, tanquam ædificii fundamentum, tanquam totius vitæ provisionem maximam & sumptum.

Tertium fundamentum, cui debet Religiosus Novellus immobiliter inherere, si cupit in Spiritus virtutisque integritate conservari: est resolutus & obfirmatus, obstinatusque amor, haustæ in Tyrocinio bonæ institutionis, omniumque piarum, quas didicit, & cœpit, vel etiam assuevit servare, consuetudinum & observationum, de qua re aliquid supra consideratum est. Etenim Novellis Religiosis contingere solet, ut cum ad studia, muniâque veniunt, excipiat eos, propter novitatem; mutationemque illis insolitam verecundia quædam observandi liberè, & palàm ea, quæ in Novitiatu didicerunt, quæ verecundia quandòque etiam dicteris, jocis, nutibus.

tibusque censoriis antiquorum incutitur, quandoque ex ipsis eorum mentibus teneris adhuc in virtute erumpit. nonnunquam etiam à studio placendi, vel à metu displicendi, negligentioribus, dissolutioribus, in quos fortè incidunt, illa ipsa verecundia promanat. Eam ob rem, oportet hac in parte novum Religiosum surdum & mutum & stultum esse, & piè impudentem; dominum in virtute & possessione recti, ac tenacitate disciplinæ rigorosæ haustæ in Tyrocinio, apparere, surda autè præterire risus & censuras aliquorum, & ostendere factis, quod non specietatus pietatem disciplinamque colat, sed quòd eam in pectoris intimis radicantur gerat, nec sit arundo vento agitata, neque erubescat Christum & Evangelium, sed in virtute, ejusque cultu & possessione Dominus & haeres, sicut etiam Religiosa Domus est Regnum virtutis. Hoc si faciat & præferat novus Religiosus, subito maturæ vice in admiratione apud irrisores jocatorésque erit, simulque sibi legem ponet ac necessitatem figet deinceps in cursu temporis sic se gerendi, atque ità stabit firmus & inconcussus, ipsisque incidentibus contrarieta-

rietatibus, fiet robustior in virtute, ejusque cultu & possessione, & solidior ejus possessor, quod totum perdunt timidi, & virtutis cultum professionemque erubecentes, hominibusque magis quàm Deo placere & obedire cupientes.

Vide igitur nè sis ex horum numero, sed inter eos annumerari velis, qui potentes sunt in virtute & studium pulchritudinis habent, & audent pro Deo, pro disciplinæ cultu, pro Regularum observantia, pro conscientia suæ teneritudine tuenda, pati aliquid & contemni, contemneréque linguas. Sic enim fiet, ut & ipse robustus evadas, & alios exemplò confirmes, inque bono conserves, sicque evadas columna in Domo Dei, etiam in teneris atque primis Religiosæ tuæ vitæ annis. Tanti nimirum est, mores in Tyrocinio haustos, disciplinatos seriò profiteri & servare. Et revera ad hoc Tyrociniorum institutio præmittitur, ut mores in eis hausti, sint fundamenta morum, totius sequentis vitæ Religiosæ, qui si ab initio statim abjiciantur, quæ spes poterit esse bonitatis perfectionisque in sequenti vita. Obfirma igitur animum ad omnia animosè & sinè pudore servanda

privatim publicéque , quibus informatus & imbutus es , tam in homine interiori, quàm exteriori , néque faciliè tuam ullam consuetudinem bonam, ob metum, vel pudorem , vel pigritiam , aliámque frivolum causam in gratiam idoli : *quid dicent ?* deponas aut immutes, nisi fortè in meliorem.

## CAPUT IV.

### *De causis internis , ob quas collabitur Spiritus in Novellis Religiosis.*

**C**Ausæ , ob quas collabi solet Spiritus, Religiositasque in Religiosis novis post Tyrocinium, quædam sunt internæ & in ipsis , quædam extra ipsos. Primum internæ considerandæ veniunt.

Prima causa interna est Tyrocinium segniùs absolutum , negligentiusque curam locatam in mortificatione amoris proprii , in compressione sensuum à pronitate ad sensualia , & ad carnem & sanguinem : Item in observatione minimarum Regularum & Instructionum , Item in contrahenda

henda cum Deo familiaritate per Meditationem, Orationem, usum Sacramentorum; per examina conscientiae, sub Recollectionem, Resignationem &c. Hæc enim qui non habet, qui in Tyrocinio non collegit, & quidem in abundantia, similis est Cicadæ, quæ totam æstatem in stridore, cantu, saltuque consumpsit, veniente autem brumali frigore, omnia in arctum cogente, fructusque omnes in horrea convehente, & concludente, cogitur fame mori, & frigore rigescere, instar stulti illius pigrique, qui propter frigus arare noluit, & deinde in angustiis anima ejus esse cogitur.

Ejusmodi Novitio non esset pes extra Tyrocinium proferendus, sed tamdiu in hærendum, quamdiu non melius armatus, instructus provisusque prodire possit. Quod si quâ inadvertentiâ illum amandari contingeret, huic Tyrocinii damna per industriam Superioris, Spiritualisque Patris, dextræ fideliterque forent compensanda, Tyrociniumque extra Tyrocinium clam omnibus aliis esset peragendum & Spiritus exercitia reassumenda, donec meliori loco sit res taliter affecti Religiosi.



id enim nisi fiat, absque ruina spiritali vix possibile est ejus ædificium internum subsistere. In qua tamen necessitate sua, nè quis vel fiducia, vel pusillanimitate nimia decipiatur, & de se quàm deberet, oppositum statuatur, suo minimè judicio stabit: sed Patrum Spiritualium, à quibus abiit, & ad quos transit judicio innixus in hanc vel in illam partem inclinabit.

Secunda causa interna priori valde vicina est, Tyrocinium non omnino quidem malè absolutum, non omnino tamen intimè ejus cultura admissa, nec ad medullam cordis recepta, ità ut Novitius quidem fuerit bonus omnium sensu, cum quibus vixit, non tamen fundamentaliter, & ab intrinseco, sed magis ab externa vigilantia, & à studio devitandi censuras, non offendendive oculos aliorum, ab occasionis procul remotæ defectu, quo sit ut non tam sit bonus, quam videatur esse; nec tam sit bonus, quàm non sit malus: non sit autem, quia timet esse, & non habet occasionem ut possit esse: & item, ut iste, non suâ virtute internâ, sed domûs, in qua vivit, beneficio abstineat à malis, contineaturque in officio boni Religiosi, quod tamen sæpè  
nec

nec ab aliis, nec ab illo ipso, nisi in mutatione quapiam ex occasione advertitur, tribuiturque personæ ipsius virtuti, quod revera & fuit, & tribui debuit beneficiorum loci. Est hæc observatio S. Francisci Xaverii, & S. Ignatii, cujus hæc verba sunt: *Hoc eò dico, ut animum inducatis, & quod revera ita est, vos idcirco à gravioribus flagitiis abstinere, quòd istic (ubi scilicet manetis) occasiones Deum offendendi desint.* Nam qui nesciunt, unde tantum boni proveniat, quod loci domesticorumque beneficium est, virtuti tribuant suæ, proinde negligunt ea, quæ parva videntur, cum tamen sint per se magna: qui autem ea temerè contemnunt, parvi ipsi sunt, ac meritiò contemnendi. Hi ubi alio commigrant, ubi ab oculis, quos revereantur, abesse sibi videantur, ubi laxius se agere posse credunt, illico in deteriora labuntur, quia non habent frenum, quò detineantur: ostenduntque re ipsa, nuper non suam se virtutem internam, sed loci domesticorumque curam bonos fuisse, qua deficiente, ipsi ad irigementum prave suæ dispositionis internæ protinus devolvantur, & ejus præscripto, discipuli efficiantur. Atque hæc est obscura

occultaque causa, quæ latens, multos trahit in admirationem, dum vident illum & illum, qui in Tyrocinio solida jecisse fundamenta videbatur, uberemque Spem bonæ frugis pronitebat, in transversum valde abiisse, discolumque & gravem disciplinæ domesticæ evasisse.

Remedium huic malo est, in se ipso non altero ponere gloriam suam; hoc est, ab intrinseca cordis virtute bonum & disciplinatum esse, secumque semper & Patrem Spiritualem & domum circumferre, neque pendere à Custodibus externis, sed sibi esse cum Deo præ omnibus gravissimum, rigidissimumque censorem & disciplinæ exactorem. Talis enim est æqualis & idem semper, nec mutatur circumstantiis, vel desertus à disciplina aliena, in se ipso eam habet, atque possidens exhibet. Et te igitur talem esse cura. Si te funda in virtutem, ut in te ipsam habeas radicatus hærentem, & non extraneis, fluxis, mutantis adminiculis solum nixam. et si enim hæc quoque conferant, sine intimis tamen non diu stant.

Tertia causa est virtutum in Tyrocinio qualitarum partim paucitas, partim tene-  
ritudo

ritudo, partim ingrata naturæ nondum virtuti satis assuetæ earundem asperitas, è contra vero vitiorum, pravorumque habituum, antiquitus contractorum, nec satis per Tyrocinium expulsum, tum multitudo, tum in visceribus animæ potentiarumque illius radicatorum seu radicum remansio, tum blandities, atque cum natura corrupta consensio; quibus utrisque causis, accedit naturæ pondus semper ad sua commoda tendentis, aspera virtutis abhorrentis, ad blandimenta vitiorum arridentis Ergo funiculus iste difficile rumpitur à novo Religioso, ergo facile dissiluit quasi prono amne ad originales misérias, malitiásque suas, & sensim finè sensu, nisi valde cautus sit, & sibi invigilans, atque etiam propensionibus repugnans, retrahitur ad pristina vitiorum corruptaqué naturæ servitia, non secus & ut equus de stabulo & manu sessoris elapsus, sed nec freno, nec loro solutus facile comprehenditur, atque ad consueta stabula præsepiaque & belluinos labores redu-  
citur.

Ea propter, novum Religiosum oportet hoc de se ipso planè nosse. Primo, quòd ma-

gna adhuc in eo sit naturæ vivacitas, multa & profunda vitiorum pristinorum radiatio, paucarum verò virtutum teneritudo. Deinde oportet, ut bellum naturæ virtutisque movere non desinat, sed tanquam ingruente bello hostique in acie armatus consistat, pro teneris & nondum satis firmatis nec in usum & facilitatem adductis virtutibus, perpetuo actionum virtuosarum attentione depugnet. Uno verbò, non arbitretur se comprehendisse, non putet se jam extra periculum esse, sciat in sua natura hydram esse, cujus capita & putata expullulant: mortua est una affectio; sed vivit altera. Non cesser ergo manus tua, non dormitet vigilantia, sed quidquid potes operari, instantè operare, nunc quidem tibi hac parte ad malum propendentem repugna, nunc vero illa parte, virtutem inchoatam, & auxiliares manus poscentem sustenta. Cooperare gratiæ, teque illi tractabilem exhibe, utere mediis Religioni consueris; nec attende quid caro poscat, sed quid Spiritus velit; neque quid alii dicant vel faciant, sed quid Deus tuus, status tuus, conscientiaque tua requirat à te, quidquid de aliis sit, quidquid ab aliis sit, omit-

e tu , non negligas te metipsum , naturæ  
persecutor, vitiorum hostis, virtutum cul-  
tor, gratiæ filius, perfectionis studiosus, tui  
contemptor , Dei amator.

## CAPUT V.

*De causis externis, ob quas col-  
labitur Spiritus in Novellis  
Religiosis.*

**P**Rima causa externa propter quam so-  
let aut potest evacuari collabique Spi-  
ritus in Novellis Religiosis , est ab oc-  
cupationibus absorbentibus, quas inveni-  
unt sibi post Professionem assignatas , v.  
g. Studiorum tractatio & quid simile.

Variis porro modis absorbere solent  
occupationes ejusmodi. I. Quidem No-  
vitate sui, cum post occupationes Tyroci-  
nii novæ accedunt in manus literarum cu-  
ræ. II. Affectu vehementi & profuso, quo  
in literas ferri solent, qui ad eas applican-  
tur ; qui affectus , aliquando & studio pa-  
rendi & ex æstimatione necessitatis ea-  
rundem homini Religioso promanant, o-  
ptimis sanè ex fontibus , cæterum degra-  
vant in pravam quandóque ex immodera-

tione. III. Exactione diligentiaque docen-  
 tium, quæ item optima necessariaq; est sed  
 tamen dum plus æquo apprehenditur, val-  
 de sollicitum reddit Novum Religiosum,  
 proinde in studiorum occupationes pro-  
 fusum, temporis ordinati incurium &c. IV.  
 Æmulatione aliorum; quæ item laudabi-  
 lis est, sed tamen inordinata profusione ca-  
 rere, & ab invidia procul esse debet. V. Ac-  
 cedit his Diaboli fraus, qui in omnes occa-  
 siones intentus adest, & æstuantem ani-  
 mum per se, incendio etiam immoderato  
 inordinatôque succendit, & literarias oc-  
 cupationes sub horam meditationis, alte-  
 riusque piæ cum Deo occupationis (puta  
 Examinis, lectionis, sacri,) memoriæ ob-  
 jicit, utque interno mutato tantisper æ-  
 ctionum ordine, labor Scholasticus acce-  
 leretur, cum indubia spe, alio tempore di-  
 vina explendi concitat, quod proprium  
 est Diabolicæ imposturæ, ordinem non  
 pati, cui si semel obtemperes, ita (NB.) deinceps  
 obtrudet alias actiones urgentes, ut  
 tempus supplendæ Meditationi, Examine,  
 alterive dilatæ actioni desit, omittique il-  
 lam necesse sit, vel certè valde frivole,  
 obiterque transigi non absque jactura  
 Spī.



Spiritus & animæ, lucro autem inimici.

His malis omnibus, optimè Christi effatum medetur; hæc oportet facere, & illa non omittere. Item illa: Primum quærite Regnum Dei, & hæc omnia adjicientur vobis. Item: Reddite quæ sunt Cæsaris, Cæsari, quæ Dei Deo. Franciscus Soarez notissimæ vir sapientiæ, omnem Sapientiam eruditionemque perdere eligebat, quàm semel statum meditationis tempus negligere. Sic sapere oportet omnes, qui Religiosam Sapientiam eruditionemque conquirunt, quique olim Deum operâ suâ uti volunt, atque laboribus suis benedicere, alioqui Religiosus, scientiam quærens cum neglectu officiorum Divinorum, similis erit homini sæculari, propter lucra temporalia violanti præcepta Dei, atque negligenti cultum festorum dierum, auditionis Missæ, Concionis. Quid enim interest, ubi facias, modo facias immò vero deterior est Religiosus, qui in hoc statu locoque sacro facit, quod in sæculari, intrâ mundum hærente, culpat.

Secunda causa externa, ob quam Novelli Religiosi Spiritum deperdunt, est quandòque prava dictamina. Quæ sponte sua  
ad

ad illudendum suæ conscientiæ formant ipsi, vel certè ab aliis temerè hauriunt, hausta, tanquam oracula excipiunt, tanquam scilicet ab antiquioribus, rerum peritioribus, bene volentibus, ignorantes discernere inter bonum & malum, arripientes, quod sensui naturæ propriæque voluntati gratum, respuentes vero quod disciplinæ, Spiritui virtutisque consonum. Dictaminum hujusmodi bene longum Catalogum experientia texit. Inter alia sunt hæc

Primum. Non est tanto rigore opus post Professionem, quantus exigebatur in Tyrocinio. Ingenium Novitiorum est servile, quod scrupulosè, superstitiosè, pueriliter, putidè, ad literam omnia metiatur, & explicet. At emergendum est aliquando ex ista servilitate, & liberaliter, liberè, ingenuè, ad sensum potius & usum accommodatè utendum ingenio & regulis & disciplinâ. Scilicet sensui litera adversatur. Scilicet aliud sonat litera quàm sensus, scilicet in rebus publicis unusquisque ad libidinem cupiditatis suæ, leges trahere potest: neque sunt usquam Principes aut Majores, ex quorum ore lex

requiratur , sensusque legis in dubio cognoscatur.

Secundum. Vitam communem esse ubique locorum tenendam, legibusque loci utendum ; ad mores , non cum moribus veniendum esse, est autem turpis dissonantia inter domesticos , proinde ad aliorum mores se, ut accommodet, oportet, qui recte venit. Dum fueris Romæ &c. Turpe est , ut Juvenulus & hodie natus, reformet Religionem , Civitatem , domum ; quasi nemo sapiat alius, quasi errent omnes. &c. Sed hæc non audiantur, respondebis intra se & dicit pius quilibet : Justitiam quam cœpi tenere , non deferam. Vita communis, non est illa, quâ multi eunt, ire, sed quâ omnes debent. In Regulis ista est, & Majorum , Superiorum regimine, non plurium abusu; non reformare quemquam volo, nec deformari à quoquam patior: non ad exempla, sed ad regulas vivendum est.

Tertium est. Utinam nulla essent peccata majora, nullæque transgressionem nocentiores his aut illis ! camelum glutientes, culicem excolantes : ô stupendam sanctitatem ! in istis scilicet, minutiis &

quisquiliis solida sanctitas posita! Actum est de vita Religiosa, immo æterna, nisi hæc Pharisaicæ superstitiones observentur: In interioribus est sanctitas sita, in solidis virtutibus, non his externis coloribus. Hæc quid sunt quàm viperinæ voces, factæ ad evertendas innocentes animas, quibus respondendum quod supra: hæc oportet facere, illa non omittere. hæc aliis fortè non sunt necessaria, qui solidiora habent; mihi qui infirmus adhuc sum, & infirmæ virtutis, saltèm his observationibus minimis incumbendum est, roburque cordis tutandum.

Quartum. Non diuturni erunt isti fervores, nec longævæ superstitiones, deserent illum brevi isti scrupuli, ululabit cum lupis: ferrum ex igne recens calet & urit, refrigescet & par erit nobis. Ominationes istæ ab aquilone sunt, & brumam invehunt cordis, meramque glaciem & nivem spirant.

Timebit ergo istos minaces Prophetas, & ut falsi reperiantur, constantia virtutis efficiet. Time ne unquam vera prædixisse gloriari possit, & facias, ut nunquam veraces inveniantur.

Quin-

Quintum. Jam tempus, è Novitiatu & deliramenta exuere, cum essem parvulus, loquebar, sapiebam ut parvulus : omne quod redolet Tyrocinium, ridiculum est, & erubescendum : recedendum est aliquando à nucibus & agenda seria. Seria scilicet, quæ conscientiam lædunt, quæ enervant disciplinæ vigorem, quæ Spiritum extinguunt. Verè isthæc seria mala sunt, quæ primitiis Spiritus & gratiæ, usque adeo sunt inimica. Atqui veteranorum perfectissimus erat qui dicebat: Geram me sicut primi anni Novitium.

Sextum. Duri capitis est & ferrei oris non acquiescere, nolle credere, suis primis conceptibus inhærere : In Novitiatu non docetur ipsa intima, solidâque perfectio, sed tantum dispositiones ad illam, quas tandem abjicere oportet & ipsam perfectionem ædificare; oportet esse mansuetum & tractabilem; non cervicosum non obstinatum. Si cum Superioribus Magistris & Spiritualibus res sit, verum est obediendum esse & tractabilem animum exhibendum, sed ad omnem ventum arundinis instar flecti reflectique, quis hanc servitatem ferat ? quis obedientiam voverit,

& tractabilem exhibeat? Deo & Vicariis  
ejus obedire oportet, sed oppugnantoribus  
obstistere, aut saltèm obdurescere primæ  
virtutis est.

Septimum. Hoc vitæ genus serium &  
ad normam Novitiatus exactum, scrupu-  
losum, superstitiosumque est, proprium  
simplicium & devotulorum, est ignavo-  
rum, est pro Religione, Monasterio ine-  
ptorum, facit melancholicos, tetricos, ri-  
gidos, ad tractandum cum proximis ine-  
ptos: Si omnes sibi solis boni essent, qui  
facerent alios bonos? Religio vitam mix-  
tam habens stat conversatione, ad prox-  
imos est instituta, requirit ergo conversati-  
vos: maturè assuescendum: potest esse in  
hilaritate morum, collectio Spiritus. Sed  
& his dicendum est: Omnia tempus ha-  
bent: impleri prius opus est quod effundas,  
nec debemus esse canales, sed conchæ: di-  
scat miles in otio, qualis esse debeat in præ-  
lio: ante messem efflorescere culpatur Spiritus  
S., præcoces fructus & partus non so-  
lent esse vitales: sat cito conversabimur,  
si sat bene; non sumus antè Magistri quàm  
discipuli: In Religione sunt alii anni, qui-  
bus proficimus ipsi, alii, quibus perficimus  
alios.

Octa-

OCTAVUM. In Religionibus plus profunt docti, magnarum qualitatum, habentes talentum concionandi, conversandi, quàm illi, qui sancti sunt, modesti, ignoti; beata simplicitas sibi soli prodest, doctus, in ore omnium est, illius ingenium omnes prædicant & mirantur, etiam superiores, etiam Magni Patres. Falsè id asseritur, & cum injuria Religionum atque virtutis: Nimis clarè præcipit etiam S. Ignatius licet Religionis merè activæ fundator, *ut omnes ejus Filii, in solidarum perfectarumque virtutum studium incumbant, in iisque majus momentum esse ducant, quàm in ullis bonis externis, dontisque naturalibus, illa enim interiora sunt, ex quibus vim & efficaciam, ad hæc exteriora promanare oportet.*

Ergo Spiritus & virtus solidæque sanctitas, anima est doctrinæ & talentorum, hæc autem corpus est, & sinè illa cadaver. Bona est doctrina & necessaria talenta, sed prima virtus & sanctitas, hæc enim instrumentum, scilicet hominem Religiosum Deo conjungit, & idoneum facit, ut Deus eò utatur ad gloriam suam. Omnes ergo Religiosi conflare debent ex virtute solida, & doctrina, sed illa corpus, hæc anima



esse debet: qui autem ingeniosum sancto præferunt, insaniunt, & pedes capiti imponunt. Proinde etiam magni viri in his laudibus admirationibusque capti esse debent, nè dent errandi occasionem ignorantibus, qui putent præferri ab eis doctrinam sanctitati, & talenta gratiæ atque solidæ virtuti, totiq; se conferant, ad sectanda & captanda naturæ bona neglectis virtutibus & contemptis: quod nihil aliud est, quàm evertere totum statum Religionis, impingeréque Deo & gratiæ alapam, nec non virtuti parare ruinam, Sæcularitati autem & mundanismo aperire patentem januam.

Dictaminum perversorum finis non foret; tu hæc expendes ac ad animum demittes, diligenter fugies & ex horum similitudine vestigiisque alia cognosces, captusque esse disces, ut ab eis præierveris, libererisque.

## CAPUT VI.

*De aliis causis externis, ob quas collabi solet Spiritus in Nobellis Religiosis.*

**Q**uartæ causæ externæ, ob quam Spiritum

tum quandoque perdunt Novi Religiosi post Professionem, est, Exempla non omnino ad legem, veteremque disciplinam ac Regularum normam exacta, in quibus contingit deficere aliquando antiquiores. Hæc autem multis modis solent innotescere junioribus, atque variè etiam cor perstringere. Aut enim vident audiuntque parvis fieri, ea, quæ ipsi magni facienda didicerant audierantque in Tyrocinio, aut vident aliqua fieri, quæ nunquam viderant antehac, quæve non sperabant evenire posse, quæve sciebant vel credebant prohibita esse: aut vident impunè transire quædam facta, Superioribus ignorantibus, vel conniventibus: aut vident facultates, dispensationes, permissiones, exemptiones, immunitates, impunitatesque, aut vident abusus, licentiâsque & laxitates, commoditates superfluitatem redolentes, sive etiam non redolentes, sed necessitati aliquatenus indultas alicujus infirmi, laboribus annisque fracti: aut vident modos agendi aliquorum in officiis commendatis, puta præcipitatas actiones, festinationes perfunctorias, & specie solâtenus peractas. Commissiones etiam, largitiones & acce-

ptiones munerum : inter domesticos intérque Externos furtiva colloquia & eruptiones ad conversandum clam & invito Superiore: aucupationes curiosarum, nitidarum, comptarum, pretiosarum recularum, non absque superfluitate ; sæpe etiam fortè sinè facultate.

Hæc dum vident novi apud antiquiores, commoventur, & scandalum patiuntur teneræ, & inassuetæ talibus eorum mentes, atque conscientiæ scandalizantur. Et vel ità ut contristentur, reprehendant, censurent, vel ità, ut arrideant, imitentur, aut certè in eandem libertatis occasionem devenire gestiant, immineant, apud se statuant. Quæ utraque scandalii ratio pessima est : posterior tamen, in communem disciplinam nocendi vim habet majorem, imitatur enim mala. Utraque tamen est Novis Religiosis fugienda, ut nec damnant facientes, nec protinus æmulentur, imo nec in futurum proponant æmulari. cupiant potiùs in ejusmodi occasiones necessitatum non devenire : Sciant certissimè etiam non ideo meliores se esse iis, quorum exempla minus commoda venient : sciant sæpe virtutem esse, vel ex virtute fieri, quod

arbitrantur vitiosè factum : sciant plus prodesse publicæ & communi rei antiquiores, esto aliquibus videantur scatere imperfectionibus, quàm Novellorum teneras observantias : sciant denique non omnia omnibus apta esse, & unum effectum specie, veterano rerum gnaro minùs nocere, quàm noceret tenero & Novitio in conversatione Religiosa. Sicut unus idemque ventus quasdam arbores robustiores fovet, qui teneris nocet ; & cibus unus idemque ab unius ventriculo concoquitur commodè, alterius autem valitudinem vitiat valdè periculosè. Arma Saulis, Saullem protegebant, quæ Davidem & gravabant, & in incessu motuque præpediebant. Artium Professores & periti, etiam errores facilè vertunt in obsequium artis : rudes verò etiam in bene agendo hærent, neque securi peragunt. Simile est & in peritis ignarisque viarum : illi si errant, sciunt redire in viam, isti ex errore in errorem pergunt. Idem evenit veteranis & Juvenibus Religiosis. Tu igitur sic vivito, ut judices neminem, optimum autem quemque sequaris, potissimum autem Regularum & Spiritus ductum sequaris.

Quinta causa externa, quâ fit, ut Novi Religiosi, Spiritus damna sentiant, est conversatio cum veteranis. Videri posset ex re atq; commodo novorum Religiosorum esse, ut à Tyrocinio absoluto mox veteranis misceantur sine discrimine, à quibus praxim totius vitæ, omniumque actionum & officiorum, facile & piorsus ad oculum discant: attamen, oppositum placuit observantissimis quibusque & Magistris Spiritus & Religiosorum Ordinibus (videantur Hæftenus, & Lairvelz in Catechismo Novitiorum) quorum aliqui, Juvenes post peractum Tyrocinium, etiam ad quadriennium & amplius arcent à veteranorum consortio, Societas biennio separationem hanc definivit, ità tamen ut brevior esse non possit, protractior esse possit, prout iudicium erit Spiritualis. Observare autem est, in iis monitis quæ de separatione juniorum Societas condita habet, unum solumque esse hunc monitorum sensum, nihil omnino habere commercii Juniores cum veteranis, nullam colloquendi conversandique occasionem. Rationem adeo salubris consilii habent omnes Religiosi Ordines, nec unam, nec tenuem. Ea,

quæ

quæ de dictaminibus, deque exemplis supra considerata sunt, facile evincunt & satisfaciunt.

Accedit, quod novi Religiosi adhuc plerumque habent rudem intellectum, & ardens quidem sed tamen insipiens cor, ut nesciant se parare pretiosum à vili, & eligere bonum, reprobare autem malum. Huc facit illa cautio Domini, quâ rationem dedit, cur discipulos novos voluerit esse separatos à legalibus ritibus Ecclesiæ: Nemo, aiebat, misit vinum novum in utres veteres, sed novum in novos, nec pannum veterem assuit panno novo.

Hanc igitur tibi pone legem primo post professionem tempore, ut antiquioribus in Religione honorem exhibeas eorumque comparatione, te planè Novitium judices ac censeas, congressum tamen, colloquiumque omnino devites; multoque minus familiaritates ac confidentias, præsertim clandestinas, prohibitas, & cum ruinæ indiciis conjunctas esse scias; etiam nunc, quando contingit ex more, vel occasione veteranis commisceri, in scholis, exhortationibus, Missis, communionibus, obsequiis refectorii, sic te gere, ut veteranis ho-

norem exhibeas, sed colloquium, sed aurē, sed familiaritatē nequaquam præbeas, salvā morum urbanitate, magis etiam salvā Religiosi silentii, disciplinæque de separatione integritate. Si hæc tibi separatio esse gravis & tædiosa cœperit, si anhelare, si ambitiosè occasiones captare, vel optare congressum colloquiūmq; veteranorum cœperis, si furtivè nutibus & corridere & colloqui, habe hæc Spiritus tui vacillantis tepescentisque non levia, non dubia vel indicia, vel initia &c.

Sexta insuper causa externa; ob quam collabi solet Spiritus in Religiosis novis, est conversatio cum Externis, non eam intelligo, ad quam exponitur quis ab obedientia, quandoque etiam mox à Tyrocinio absoluto, quæ etiam si ita quoque prudens & circumspecta esse debeat, facilem tamen habet plerumq; à Deo benedictionem ex merito obedientiæ, & observatis mediis à Religione præscriptis: sed illam intelligo conversationem cum Externis, præsertim cum discipulis atque adolescentibus, ad quam nonnulli nonnunquam Religiosi sicut temerariè prorumpunt, ita infelicissimè alliduntur atque confringuntur, & tum

vir-



virtutis, tum Spiritus, tum disciplinæ, tum omnino fidei pudorisque naufragium faciunt, sæpe vocatione, sæpe & mente ipsa excidunt. Hoc malum à parvis, & vix notandis culpandisque initium sumit. Sed nisi Religiosi adolescentis anima conscientiaque cauta sit, & tuta etiam timeat, in arcta affectionum incompenfabilium vincula sese induet sensim, ut nullæ diligentia, nullæ custodiæ, nulla consilia, nulla impedimenta, nullæ poenæ coercituræ sint, dissoluturæve infelicem amicitiam, & viscerosi affectus amorisque conglutinationem.

Cavebit ergo Novus Religiosus sibi à se ipso, à Zelo suo, ab amore suo, ab oculis suis: Cavebit à munusculorum per se, vel alium oblatione: cavebit ab invitatione ad hunc illumve locum colloquendi gratia: cavebit ab æmulatione aliorum, ab invidia conversantium, cavebit à laudibus & commendationibus: cavebit à castissimo quamvis affectu, cavebit ab omni occasione, provocatione, blanditiis, occurribus, à spontaneis sui ingestionibus: sciat certissimo, inconstantissimos & illusorios tales esse amores ei, dum is, qui amat, insanit, effunditque se maxime: tum eum, qui ama-

tur captaturque, illudere, & insultare amanti maximè. Noli ergo, ô simplex & imperite rerum Religioſe Novelle dare te in gaudium inimicis tuis, noli ponere maculam in gloria tua, eſſe proditor pudoris tui, noli eſſe captivus tyrannici affectûs tui. Si amorem & æſtimationem vis omnium, præteri illos cum honore, meliores illos fac, ſilentiô, verecundiâ, modeſtiâ, ſtudiô, Religioſo exemplô, humilitate. Tales enim Religioſi ſemper ſunt in admiratione, æſtimatione, veneratione: His verò diſſimiles contemptui ſunt, fabula ſunt, illuſioni expoſiti & proſtituti tam domi, quàm foris ſunt, præſertim quod innumeris, iisq; graviffimis moleſtiis, internis & externis, conſcientiæ aut famæ, apud Superiores obnoxii ſunt, faciant te cautû hæc conſiderata, malis que ea conſideratione diſcere, quàm infelici experimento tuo alijs in exemplum eſſe.

Septima cauſa externa, ob quam collabi ſolet Spiritus in Novis Religioſis, eſt converſatio & excuſſio ad conſanguineos Parentesve. Ad hanc excuſſionem, ut plurimum inviti Novi Religioſi ab initio deſcendunt, extracti nempe, vel neceſſitate domesticorum negotiorum, vel importu-

nita-

nitare flagitantium: unde ab initio, ut dixi, coacti ad suos discedunt, cum tædio apud eos moriantur, repugnanter ad eos revertuntur, sensim tamen hæc repugnantia tollitur, animique ille rigor à Religiositate contractus, mollescit ac deponitur, dulcescit conversatio, & conspectus suorum, sensualis illorum amor, teneritudo, sollicitudoq; pro eorum bonis successibus admittitur, vel reviviscit, libenter adeuntur vel audiuntur, quomodo illis auxilium vel solatium excogitari possit, cogitatur, ex proposito negotia trahuntur, non finiunturque, ut haberi possit iusta occasio redeundi ad illos in tempore, trahiturq; res per annos plures; ut conversandi semper sit necessarius prætextus. Interea impletur anima, mundo, carne, sanguine, tricis, curis, sollicitudinibus, intercessionibus, odiis & simulatibus: inciditur in antiqua vel in nova pericula lapsuum, libertatum. peccatorum: accipiuntur clanculariè subsidia necessitatum, cum injuria paupertatis, & obediendi Religiosæ, datur occasio sermonibus, oblocutionibusque domesticorum, molestiæ, amaritudini & solitudini, & suspicionibus Superiorum: *Quandæque Superiorum*

periores ipsi Spe lactantur commodorum temporalium : ostentatur etiam aliquis fructus Spiritualis, emendatioque morum secuta in Parentibus, in fratribus, affinis, ex sublati odiis insidiisque inter vicinos : sed interim ipse Religiosus Spiritum amittit, disciplinæ impatiens evadit, aspirat ad vagandum morandūque extra domum, jacturam studiorum, qua Spiritualium, qua literariorum subit, de bono nomine tam suo, quàm Religionis, non parum detrahit, quin etiam in tentationes de vocatione, de castitate incidit, & aut naufragiū sui simpliciter facit, aut ægerrimè, expoliatus, laucitusque evadit. O quanti suo infelici experimento ista didicerunt ipsi, docueruntque alios.

Amator ergo sui Spiritus, sui status, suæ integritatis virtutisque Religiosus omnis, difficillimus erit & rarissimus, in adeundis Parentibus, consanguineisque, brevissimus & parcissimus in mora, in mansione, & colloctionibus eum eis. Erit inter eos tanquam peregrinus & alienus, testem sui, socium habebit semper, & vel nolentem apud se retinebit, vel nec discretionis causa abire patietur, citissimè ab eis avolabit,

caus

causas eos adeundi, vel cum suâ temporali  
jactura præscindet: in se, non in Superio-  
res, cur consanguineos adire vel nolit, vel  
non possit, devolyet, à Superioribus au-  
tem invidiam amolietur. nihil ab eis ac-  
cipiet pro se privatim omnino; curas,  
tutelas, patrocinia, negotiorum tractatio-  
nes nullas suscipiet, sed ex Christi Regula,  
ut mortui, mortuos suos sepeliant, sinet.  
Hæc bene considera & penetra, & in usum  
tuum converte, & conversationem cum  
carne sanguinéque omnimodè devita: Ne-  
que unquam crede te habere adeo firmum  
Religioso rigore pectus, ut calore, san-  
guine molliiri, naturaliumque necessitu-  
dinibus & amorum familiaribus jacu-  
lis penetrari & impugnari non possit.

## CAPUT VII.

*De Industriis, quas servant ii,  
qui ex Tyrocinio ve-  
niant.*

**C**olligi quidem possunt ex præmissis,  
potissimum ex prima & tertia, aliquæ  
Industriæ, quas propter Spiritum con-  
ser-

fervandum, servant ii, qui ex Tyrocinio veniunt, sunt tamen aliquæ particulares, quæ plurimum juvent Novum Religiosum ad vitam degendam post Professionem, licet etiam servire possint iis simpliciter, qui ad locum, studium, munus aliquod de novo veniunt, esto non sint de Novis Religiosis.

Industria I. Cum aliquis de novo ad aliquem locum, studium, officium venit, maxime si ex Tyrocinio & Novus Religiosus est, sumpto aliquot dierum spatio semetipsum aliquantulum recolliget, & qualiter vitam suam Religiosam, attentâ occupationis suæ futuræ naturâ, nec non ejus Regulis, ducturus sit, apud se statuet, assignando quoad poterit, his piis Exercitiis consuetudinibusque tempora certa, loca, occupationes, occasiones, in quibus ea conservare & exercere velit, absque censura & nota aliorum, absq; damno suo, absq; præjudicio aliorum, cum accommodatione ad communem & laudabilem ejus loci, vel officii cursum receptumque modum.

Industria II. Contrahet notitiam competentem cum Superiore suo, Patrêque Spirituali & Professore futuro. Et Superiori quidem ac Patri Spirituali, sive Confessario.

Confessario statum suum interiorem necessitatēque aperiat, ut ab eis tantò fidentiùs certiusque dirigi possit, tum etiam documenta & cautelas, secundum quas vivere, officiūque assignatum obire debeat, salvā disciplinā Religiosā, salvā Conscientiā Spiritūsque sui integritate. Professori verò seu Magistro suo, se quoque quantum ad studia literarum, quæ illo docente tractaturus est, submitter, ab eoque similiter congruam directionem, & monita & modum studendi postulabit. Atque hunc in Spiritualibus, internisque suis necessitatibus recursum ad Superiorem Confessariūque: in literariis verò ad Professoremservabit, cum simplicitate ac sinceritate Religiosa, sinè ullius noxa, stasis, quoad vel ipsi commodum, vel illis placitum erit temporibus.

Industria III. Supellectilem suam Spiritualem, quam ex Novitiatu sive in animo & corde memoriāque, sive in libellis scriptam collectāque extulit, secum recolet revisetque ac proposita releget. Neque unquam sinet sibi hanc Novitiaticam provisionem, haud dubiè divinitus sibi in primitiis Spiritūs communicatā vile-

vilescere, deque manibus aliquomodo excuti, aut in contemptum, desuetudinem oblivionemque venire. Hoc enim sine injuria Divinæ Providentiæ atque gratiæ, itemque sine multiplici & gravi animæ suæ detrimento non fieret, imo majus opinione, citiusque Spe, malum & ruendi periculum ex hoc neglectu incurreretur, sicut enim in naturalibus rebus, eadem sunt principia conservativa, quæ fuerunt constitutiva rei, ita & in Spiritualibus iisdem omnino exercitiis observationibusque commodissime status internus animæ conservatur, nutritur, fovetur, & ad profectum maturitatemque deducitur in vita post Professionem, quibus ab initio est per Novitiatum constitutus & natus & formatus. Itaque Novitiatica exercitia & subsidia, provisiones, Supellectilésque non possunt sine præstantissimi Spiritus jactura vel negligi, vel omitti, vel oblivioni tradi, & semel amissa vix unquam satis revocari & recuperari poterunt. Repetenda ergo erunt vel relegenda, & sermone cum aliis in memoriam, in usum praximque revocanda, quæ benè & salubriter in Tyrocinio audivimus, observavimus, inchoa-



vimus, proposuimus, in adversaria scripto retulimus. Neque ab hac Industria ulli nos respectus revocabunt, si boni æmulatores zelatorésque Spiritûs esse voluerimus.

Industria IV. Ab initio statim vitæ post professionem aut Mansionis suæ in conventu, loco studii, officii, aliquod profitebitur virtutis & disciplinæ Religiosæ studium curamque etiam in minimis & obviis rebus; profitebitur, inquam, opere magis quàm voce. Et quidem in rebus ordinariis ordinariam, non autem eam, quæ singularitatem aliquam redoleat, & Novitatem sapiat, affectionem odiosam notabilémque insinuet. Hæc liberâ virtutis & disciplinationis professione, & sibi ipsi imponet necessitatem, ita deinceps peragendi, nec stylum mutandi in moribus: & aliis ædificationi erit, & discolorum laxiorumque mox à se familiaritatem arcebit. Quæ industria permultum facit ad pacem & constantiam consequentis temporis. Qui enim initio statim, ita liberum & dominum se in virtutis studio ostendit, liberum solidumque passum facit, & fundamentum jacit, ad Dominium de-

in-

inceps in virtute continuandum, sibi que  
affervandum.

Industria V. Cavebit curiositatem vi-  
dendi, sciendique inutilia, non necessa-  
ria, aliena: Cohibita enim hac curiosita-  
te ab innumeris se immunem servabis  
curis, cogitationibus, timoribus, con-  
siliis; conjecturis, suspicionibus, censu-  
ris, scandalis, quod si eam non cohibue-  
rit, si Spongia esse velit, & omnia ad se no-  
titiámque suam attrahere, sentiet malò  
suò sententiæ illius veritatem. Qui addit  
scientiam, addit dolorem. Fugiet ergo  
inutiles notitias, nec nè ultro quidem se in-  
gerentes admitter, sed gratis dimittet,  
prout gratis venerunt; neque pro brevi  
dulcedine curiositatis, longissimam, ma-  
ximéque variam emet poenitudinis poe-  
nam.

Industria VI. Amabit & incolet cu-  
biculum suum, neque ab eo digredietur,  
neque morabitur extra illud unquam si-  
nè necessitate, in ambulacris, publicisque  
locis nunquam subsistet, neque se aliis for-  
tè subsistentibus unquam adjunger, sed tan-  
quam urgente necessitate, alio vel ad cubi-  
culum suum vocaretur, sic festinabit evo-  
lare

are è publicò, multa per hanc industriam vitabit incommoda, congregabit commoda, non audiet inutilia, servabit silentium, non perdet tempus, officio suo fungetur, pacem internam tuebitur, non incurret complicitatem aliorum defectuum, non superioribus, non disciplinæ gravis erit onerosusque. In cubiculo autem semper utiliter se occupet, studendo, legendo, scribendo, orando juxta temporis ordinem & exigentiam, excludendo inutiles occupationes. Solent enim hæ esse tentatio Diaboli & illusio, ut imperata, occupationes, ægrè, obiter, raptim, negligenter faciamus, voluntatis vero propriæ inutiles, impertinentes, cum tota effusione applicationeque peragamus.

Industria VII. Inter præcipua studia instrumentaque virtutis ac scientiæ reputabit ordinem temporum & pretium temporis. Omne punctum temporis habeat adnumeratum, ita ut cuilibet micæ temporis particulæque habeat adnumeratam occupationem bonam, quæ scilicet vel doctrinam, vel pietatem redoleat, de operam, ut particula boni diei non eum prætereant, nec illi otiosè effluat, tantum enim

enim revera perfectionis in gratia , in merito, in virtute , in perfectione , in gloria æterna , in scientia, in vita denique perdit semper, quantum perdit de tempore, potissimum autem micæ & reliquias temporum impendat ex proposito, ejaculatoriis orationibus & reflexionibus, super præteritis sequentesque actiones, aut renovationi intentionis, aut invocationi Divini auxilii, aut præsentia Dei, aut exercitio virtutis menstruæ, Examinisque particularis aut aliis actibus piis, faciens id suaviter sinè actuacione & nimia sollicitudine. Tali namque temporis observatione dicescit anima, pinguescit devotio, fervor conservatur & augetur, gratia Dei cumlatur, unio cum Deo familiaritasque initur, & innumera alia bona acquiruntur, mala vero excluduntur, adeo ut ne otiosæ quidem cogitationi spatium relinquatur,

## CAPUT VIII.

### *De Industriis studendi literis atque scientiis.*

**S**Ciendum aliam rationem esse studendi Religiosi hominis, à ratione studendi hominis sæcularis. Sunt qui scire volunt, ait S. Bernardus, ut sciant, & curiositas est: sunt qui scire volunt, ut sciatur, & vanitas est; sunt qui scire volunt, ut scientiam vendant, & turpis quæstus est; sunt qui scire volunt, ut ædificentur, ac ædificent, & hæc sapientia atque Charitas est. Atque hoc postremum debent spectare Religiosi omnes, siue dum literas aliis tradunt, siue dum ab aliis discunt, ut nimirum & ipsi ædificentur, & ædificent alios, promoveantq; ad salutem & perfectionem, Deum autem glorificent, ut inquam ritè in studendo se gerant, his industriis juvari poterunt.

Industria I. Religiosus studeat juxta mentem, Spiritum & intentionem suæ Religionis, quod aliud nihil est, quàm stu-

D

dere

dere in ordine ad zelum gloriæ divinæ, salutisque & perfectionis tam suæ propriæ, quàm proximorum, ut nimirum efficiatur idoneum Instrumentum Dei & Ecclesiæ & Religionis ad proximos Deo lucrandos, utque securè non minùs quantum ad virtutis, quàm; quantum ad Religionis absolutiōnem, aut saltem sufficientiam exponi à Religione possit, ad ministerium Evangelii, & ad eruditionem directionemque animarum per viam salutis.

*Industria II.* Religiosus studeat securi- dum Regulas studentibus præscriptas: cum quo coincidit studere secundum directionem Præfectorum, Professorumque suorum, sic enim studentibus soles divina bonitas benedicere singulariter, tum ut proficiant notabiliter ac facilè, tum ut deinceps tempore suo scientiis eorum utatur Deus, atque labores prosperet, ut sint & Dei gloriæ, & sibi ipsis & proximis proficui, secus autem accidit iis, qui aut sinistra intentione, aut præposterò modò præcepta mentem regularum, contra directionem præceptorum, studiis operam dant; horum enim operâ vel non utitur Deus, ve-

non benedicit, vel ad summum naturalibus temporalibusque mercedibus compensat labores eorum.

**Industria III.** Religiosus studeat cum diligentia humili, cum humilitate, diffidentiaque sui diffidenti, laboriosa & constanti. Humilitatem in studendo, colloco in sui ingenii laborisque diffidentia, in Divinæ autem opis & benedictionis imploratione atque fiducia, quod sibi Regula expressè præcipiens Religiosis crebram Divinæ benedictionis efflagitationem, ad hoc ut in doctrina proficiant, juxta S. Ben. in prol. S. Reg. *quidquid agendum inchoas bonum, à Domino perfici instantissima oratione deposcas.* Quod etiam facit diligens, & seria Spiritualium rerum tractatio, maximè orationis: facit hoc etiam cultus & amor æternæ sapientiæ specialiter, ejusque Matris Sanctissimæ, denique Patris luminum, & totius SS. Trinitatis veneratio. Huic porro invocandi opem Divinam studio, sui que diffidentia ex æquo debet labor conatusque indefessus respondere. Cælum enim laborantibus favet, otiosis adversatur, nec meretur exaudiri ille, qui,

**D 2** . . . . . quod

quod in se est, non facit, Deoque non cooperatur. Scire enim debet omnis Religiosus à Religione ad studendum applicatus, quod si id negligenter perfunctorieque tractet, quod commissum habet, multis modis invenitur reus. Nam & in Deum & in Ecclesiam Christi, & in Religionem, & in Fundatores Benefactoresque, & in proximos, & in semetipsum injurius esse cognoscitur convinciturque, fallit etiam omnium Spem, eludit, & fraudat eos fructu studiorum suorum debito; quod cum Deum justissimum Judicem impunè transire non possit, formidare certè deberet illam Domini comminationem: succide illam, ut quid etiam terram occupat.

Industria IV. Religiosus studeat ordinatè. Ad ordinem hunc multa spectant, sed potissimum, ut confusio vitetur, nec desultoria levitate, nunc hoc, nunc illud arripiatur abjiciaturque: nec perturbentur tempora, nec discendorum series commutetur: habeat tempus suum quolibet studiorum discendorumque portio, nec quicquam anteponatur illis studiis,

quæ



quæ ab obedientia præcepta sunt. Sequi enim impetum naturæ & calorem phantasiæ, irreligiosum est. Ubi satis feceris his, quæ imperata sunt, forsitan licebit indulgere ingenii æstui & privatæ cupiditati, modo & illa sobria, utilisque sit, nec ullô modo præjudicet obedientiæ, &c.

Industria V. Religiosus studeat adæquatè ingenio capacitatique suæ. Non debet quisquam ex facilitate felicitatæque ingenii negligentior reddi. Sicut enim absurdè ageret lepus naturâ velocissimus, si ex eo, quod testudinis asellivæ cursum facile æquare posset, non jam vellet uti velocitate sua in currendo, ita felix sortitus ingenium, nequaquam à culpa negligentiae immunis est, si propterea à labore in studendo sibi adæquato cesset, quod tardior minisque capacem citò æquat. Cui plus datum est, plus requiretur ab eo; à feraci gleba, plus exigitur quàm à sterilibus arenis, gaudet mercator, si modicis impensis ingentia lucra parare potest, neque ideo cessat, quando videt alios majoribus impensis minora querere: non propterea Deus ingenium

felix providit largitusque est tibi, ut inde deses evaderes, sed ut capaciore ingenio plura capere contenderes, facilitateque profectus ad magnum profectum, & ad excellentem fructum messēque doctrinæ evolares, hoc si non facis, fraudas Deum sine suo, & desodis talentum, sudario illud involvens, laborem sudorēque fugiens. Quod si contingat aliquantum ingenium, non proinde felix sortiri, non propterea is abjicere manum debet, sed felicitatem conatu laborēque supplere. Meliores sunt plerumque profectus parti labore, quàm felicitate & facilitate, sicut diutius durat, quod æri incisum, quàm quod in terra & aqua est scriptum, esto hoc sine labore, illud cum molestia etiam perfectum sit. Quare facilitas labore pensanda est, quia labor vicissim duratione ac soliditate pensabitur.

Est autem vitandus quidam scopulus, in quo non pauci impingunt: Ostentatio atque aucupatio felicitatis, vilitatisque & opinionis de eadem. Volunt enim aliqui videri sinè multo labore, multum proficere, multa facere, citò peragere, cum ta-

men sæpissimè in re aliter sit. Verùm quidquid sit de hac veritate, hoc verum est, majorem esse laudem justioremq̃ue ac prudentiorum commendationem, si perinde laboriosus ac ingeniosus sis, ut dubitent alii quid præstet in te, labóre ingenii facilitati, an ingenium labori? Sicut enim optimus est ager ille, qui & specie & re ipsa ferax est, ità illud ingenium optimum, quod facilitatem labore adæquat. Talem ergo ambitionem facilius ferendam crede, si te æquè facilem ac laboriosum probes in discendo.

Industria VI. Religiosus studeat jungendo literas cum pietate. Hæc enim oportet facere & illa non omittere, pietas ad omnia valet & præcipuum instrumentum est sciendi, puritas cordis. Etenim malevolam animam non intrabit Sapientia. Scientiæ, corpus sunt, virtus anima: nihil prodest corpus sinè anima: nihil etiam facit anima sinè corpore, præstat tamen longè anima corpori. Ut sit homo integer, utroque constare debet, ut homo Religiosus sit integer & absolutus, doctum & probum esse oportet.

Completa laus est non minùs esse solidè doctum , quàm solidè sanctum : Scientia sinè charitate inflat , charitas sinè scientia , se quidem , sed non proximum ædificat.

Industria VII. Religiosus studeat sinè invidia & æmulatione charitati inimicâ , gaudeat alieno profectu perinde ac suò proprio , ad amandùmque invitetur ipsis talentis condiscipuli , ingenuæ mentis hoc est , quantò magis Religiosæ. Igitur neque profectu , neque gratia apud alios , sive pares sive superiores movebitur ad invidiam , ad obrectationem , ad fugillationem. Sicut etiam suo profectu , suo successu , suâ apud alios gratiâ , non ducetur ad contemnendum , ad deprimendum alios , sed potius dabit operam , ut omnes alios æstiment , ament , complectanturque sicut & se , etenim charitas non æmulatur , non inflatur : immò si multitudinem aliorum peccatorum cooperit , quantò magis fratrum. Perinde sordidi animi est invidere quod alteri bene est , ac invidere si alteri tecum bene sit.


Si


Si amaris, velis etiam alios amari tecum si amas, dilata amorem & ama plures, tantò melior es, quantò plures amas, si amantur alii, gaude & congratulare, ut sis & tu bonus amando sicut sunt alii &c.

Industria VIII. Religiosus studeat solidè, fundatè, fundamentaliter, cum possèssione scientiæ, cui studet. Qui enim in Religione discunt, non tantum suâ curâ student, sed ut si placuerit Superioribus, doceant alios, cui ergo dubium, quod solidè ab eis opus sit, scientiam facultatèmq; possideri, quàm sunt aliis tractaturi: studeat etiam delectabiliter, ut eum delectet studere, scire & discere: hinc enim fiet, ut jucundè, ut libenter studeat, nec pigrescat in labore, nec molestè ferat, imo appetat docentium diligentiam. Hinc etiam fiet, ut spontè studeat, ut supra id, quod docetur, scire proficereque contendat, ut studendi nunquam finem faciat. Hinc etiam fiet, ut se gratum Præceptori in omni vita exhibeat, & doctrinæ, simulque labori eorum per se affectus sit. Alias  
In.


Industrias petat è vitis Sanctorum tam  
sui ordinis v. g. Bernardi, Bedæ, Ansel-  
mi &c. quàm aliorum ordinum, v. g.  
Aloysii, Alvari &c. Tu his Industriis  
utere, Deum in auxilium in-  
vocans &c.














Biblioteka Jagiellońska



stdr0022091

